

Haab vnd Gut wol verwahret seyn werde. Gleiche bedeutung hat diser Traum dem/der sonst eine Dienerin oder Haushalterin zubestellen/ fürgenommen.

Diser Traum ist denen nit gut/ die wandern oder außgreysen wollen / Dann er bedeutet ver hinderung/ behaffung vnd verschliessung/ Dann zu einem offenen weg bedarff man der Schlüssel nit/ sonder zu beschlossenen Thüren. Darumb werden wir auch durch ein solchen Traum verhindert/ gleich als ob wir durch ein beschlossene Thür gehen wolten, ohn ein Schlüssel.

Welcher aber ein Schaffner were/ vnd frembd gut vnterhanden vnd zuverwalten hett/ dem bedeutet diser Traum/ das ihm gänzlich ver trawet würd: Dann die Schlüssel werden niemand leichtlich vbergeben/ man kenne ihn dann/ vnd ver traw ihm wol/ sonderlich vber solche dinge/ daran vil gelegen ist.

## Von Köchen.

### Das XLIX. Capitel.

**T**räumet einem wie er ein Koch in seinem Hauss habe / das ist denen die Wirtschaft oder Hochzeit halten wollen/ ein guter Traum: Dann zu solchen dingen bedarff man der Köch. Diser Traum ist auch den Armen gut: Dann die Köch werden nit zur vberflüssigkeit/ grossen Bancketen/ vnd Gastungen gebraucht.

Dem Krancken bedeut diser Traum scharpffe schwere/ vnd hitzige Kranckheit/ von böser vnordenlicher vermischung hitziger vnd scharpffer feuchtigkeit: Dan die Köch seynd statts in der Hitz/ Sieden vnd Braten mancherley selzamer Brüh/ Mus vñ Suppē/ Sawr/ Süß/ Seyst/ vnd Mager/ zc. Diser Traum bedeutet auch

auch